

Cuidao cu culebra cu pia

Awe noch mi ta presenta mi tres bukinan na Biblioteca Nacional departamento Arubiana den Bachstraat 5.

Ayera mi a skirbi di e buki "3 Gota pa dia" y a keda di menciona algo di e otro dosnan, "Color di Biento" y "Abrenuncia".

Manera menciona ayera, "3 Gota pa dia" ta basa riba anecdotanan di cosnan cu mi a pasa aen di tempo di school te awe cu mi ta "**hombier bieuw, grandi, anciano, y manera mi coleganan ta yamami, "fossiel na bida" y "Dinosaurio di DIARIO".**

E dos otro bukinan ta distinto.

Nan ta riba cosnan cu nos tur a yega di tende di nan, a yega di lesa di nan, a lubida nan y lo bisa despues "**mi no tabata sa esaki**".

Nan ta cosnan tocante nos cultura y nos historia, pero skirbi den un contexto di lesamento agradable di un storia conta cu e cultura y historia meti aden.

RIPITI Y TUR HENDE LO KERE

Mi semper ta bisa cu si bo keda ripiti un mentira como un realidad, tur hende lo cuminsa kere e mentira como realidad y te asina leu cu bo mes ta kere e mentira aki.

Den nos historia tin masha hopi di e mentiranan aki cu a bira realidad pasobra e storia a keda wordo ripiti.

Loke ta e kerencianan di antes, awendia no ta tur hende ta kere den nan mas.

Nan a wordo ripiti tanto den "**tempo bieu**" cu den tempo moderno ningun hende ta menciona nan mas.

"**Cuidao cu culebra cu pia**" ta di e kerencianan aki. Mi ta relata di tur e kerencianan (cu mi por a compila) cu ta conoci riba nos isla.

Tin den dje tur e kerencianan relaciona cu Diabierna santo y motibonan di sencia cas pa habri aña cu suerte.

Ta den e kerencianan aki bo or bin topa cu "**E culebra cu pia**".

"**Willy Shoco ta saca spirito di bo curpa**" ta relata di e hacido di bruha.

Muhernan masha bunita sa bishita pa suerte.

Den Willy Shoco por lesa con bo por tene bo homber pa e no bandonabo.

Riba cierto dia pa mey anochi bo ta coge carsonsiyo of jockey sushi di bo casa y bay dera esaki den cura di cas.

Si e maniobra aki funciona, nunca bo casa ta bandonabo pa oro.

NO TA HAYA SANTANA

Den "No ta haya Santana" bo ta haya sa si bo ta wordo dera den santana of den chike si bo no ta cumpli cu bo religion.

Tambe e pagamento pa banki na misa y con bo ta wordo cori si bo ta sinta riba banki reserva pa cierto persona of famia.

E storia ey ta trecebo den e storia di "**Yoncuman ta manda carta**".

Aki por lesa di e casamentonan di antes.

No ta menciona e casamento cu burico como "**vehiculo luhoso**" pa carga bruid.

Ta menciona mas bien e pidimento di man e periodo di namoramento, y e celebracion.

Den un forma cu hende por compronde awe cuanto dolor tabata tin pa bo por a casa cu e mosa cu bo ta desea.

E restaurantnan na Aruba no a keda afo.

Tin relato riba nos restaurantnan; e mihor lunch na mundo cu mi a

come y tambe storia riba restaurant cu ta dunabo show gratis.

E bar-restaurantnan cu mamasita y papasito tambe ta wordo menciona.

MUHER CASA CU FAAM DI SOLTERO

E problema grandi cu hopi hende ta haya awendia ta cu muhernan cu casa-no kier acepta faam di nan casa.

Nan a prefera di keda cu nan faam.

Mi ta conta di Angelina Croes, casa cu Ramon Brete.

Angelina mester ta Angelina Brete Croes, pero kier carga Croes so.

Ramon a haya e problema pasobra el a bira pa tur hende Ramon Croes- Brete.

Carta ta yega pa Sr. y Sra. Croes Brete of Sr. y Sra. Brete Croes te cu ni biaha nan no por biaha mas como pareha pasobra hotel no ta acepta nan como pareha tampoco.

Boso ta corda e temporada di hisamento di flie con dushi esaki tabata antes compara cu awe?

Ta hisamento di flie, subimento di flie, of ta bulamento di flie?

Kico mi tin cunes.

Tur hende sa kico mi kiermeen toch y dia mi siña mas di mi papiamento mi lo sa sigur ta cual nos lo sigui usa den futuro.

Boso ta corda tempo cu hopi cas tabata tin baki cu pisca den cura y tambe aquario den cas y con tabata cuida e piscanan?

Ta hopi pisca a wordo horta tambe for di baki pafo den cura.

E otro baki ta e baki di landa cu hopi hende lo a lubida cu tabata existi.

Awe nan ta yama esaki Piscina y nan ta moderno pero antes, e baki di landa tabata e "**cos**" di luho cerca esnan cu placa, y cu awa di pos den nan.

Bo por landa henter dia den baki di landa, pero tabata tin tambe un condicion masha pisa pa esnan cu ta usa e baki aki.

E buki ta conta di esaki.

LOKE TABATA NOS WEGANAN AYERA

Den "**Abrenuncia**" tin storianan di tur locual bo no a haya den e otro dosnan.

Bunita bisa no?

Un di nan sigur ta e weganan di antes.

Ki weganan nos tabata hunga?

Cu kico nos tabata hunga?

Mucha muher y mucha homber hungando e mes weganen.

"**Ban hunga papi cu mami**" tabata popular pero mi no sa si e ta wordo menciona si.

Ta lesa mester lesa e buki pa ta sigur.

Tambe lo por lesa di nos manera di bisti antes y tur kico nos tabata usa pa maquiyahe, y pa hole dushi of hole vies manera "**sushi di porco**".

E cabeynan cu lagoen di zeta of crema den nan.

E sapatonan di punto te rondo dilanti, e sombre y petchinan.

Hotpants, jeans, bikini, zoet zoet, smallbottom, mini, maxi, y asina por menciona algun, pero tur esaki ta keda pa e lector por sclama despues: "**Abrenuncia**".

Juby Naar